

ԱԶԳԱՅԻՆ ՄԵԾ ՏՕՆԸ

1500-ԱՄԵԱԿ ՀԱՅ ԳՐԵՐԻ ԳԻՒՑԻ ԵՒ
400-ԱՄԵԱԿ ՀԱՅ ՏՊԱԳՐՈՒԹԵԱՆ

Վեհափառ Հայրապետի բարձր հովանու տակ ս. էջմիածնում Կաթողիկոսական կոնդակով հաստատուած է ՀԱՅ ԳՐԻ 1500-ամեակը և Տպագրութեան 400-ամեակը համայն ազգի մէջ տօնախմբութիւնը կազմակերպող յօրելեանական կենտրոնական յանձնաժողով, որի անդամներն են՝ Մագիստրոս Մեսրոպ եպիսկոպոս, Բագրատ, Բարգէն, Գարեգին, Մատթէոս, Ներսէս վարդապետներ, դպիր Գալուստ Տէր-Մկրտչեան, Ճեմարանի ուսուցչապետներ՝ պ. պ. Աբեղեան, Արրահամեան, Ալթունեան, Էդիլեան և Կանայեան:

Յանձնաժողովը պ. Գալուստ Տէր-Մկրտչեանի նախագահութեամբ ունեցել է մի քանի նիստ և իր որոշումը ներկայացրել է Վեհափառ Կաթողիկոսին, որ մայիսի 8-ին հաստատել է: Ահա այս որոշումները՝

ա) Միացնել հայ տպագրութեան 400-ամեայ յօրելեանի հանդէսը տառերի գիւտի 1500-ամեակի հետ և կատարել այդ մեծ յօրելեանն այս տարի հոկտեմբերի 13-ին ս. Թարգմանչաց տօնին.

բ) Հիմնել դպրոցական Փօնդ մեր հոգևոր և եկեկեցական-ձխական դպրոցների բարգաւաճման և բազմացման համար.

գ) ս. էջմիածնի մատենադարանի կարևոր ձեռագիրները պարբերաբար հրատարակել.

դ) Մեծ յօրելեանի առթիւ հրատարակել մի գիտական ժողովածու.

և) Հրատարակել հանրամատչելի գրքոյկ համաձայն Յօրելեանական Յանձնաժողովի Գ-րդ արձանագրութեան Գ-րդ յօդուածի և ցրել լոյրը դպրոցների աշակերտներին և ժողովրդին ձրի.

Գրել այս մտքով կոնդակներ Յանձնաժողովի և լոյրը առաջնորդների անուշով, իսկ դպրոցական Փօնդի ժողովարարութեան համար Կովկասի Տ. Փոխարքայից թոյլտուութիւն ստանալուց յետոյ, 8 մայիսի, թ. 344.

Յօրել. Յանձնաժողովը որոշած է եղել էջմիածնում հիմք դնել այդ մեծ տօնի առիթով և գիտական մի պարբերական հրատարակութեան, բայց դրա որոշումը դեռ չէ հաստատուել Կաթողիկոսից:

Համարելով ս. էջմիածնում Կաթողիկոսի հովանու տակ գիտնական միաբաններից և Ճեմարանի ուսուցչապետներից կազմուած Յօրելեանական Յանձնաժողովը օրինական և հեղինակաւոր, նրա որոշումներն էլ պարբերաբար կը տպագրենք թէ Տարագում և թէ կը հաղորդենք արտասահմանեան թերթերին Միջազգային Մամուլի դաշնակցութիւնների միջոցով:

Հայ գրի և Տպագրութեան յօրելեանին նախընտրած Աղբիւրի և Տարագի №№-ը լոյս կը տեսնեն հոկտեմբերին: Մանրամասնութիւնները ժամանակին: